

无上内秘真藏經卷之二

洪九

惠澤品

爾時

元始天尊與諸眷屬及大弟子住靈解山顯諸法相示奇特身微妙第一諸仙童子充塞

虛空圍繞千匝百億獅子備衛左右猛獸毒蟲各獻奇寶諸天發瑞自然音樂種種殊妙不可思議爾時

天尊散本微華其華飄飄遍滿法界非青非白非赤非黑非長非短非大非小非廣非狹

入於細微離諸色像華中有自然之果其果圓淨具一切味非一切味具一切聲非一切聲具一切色非一切色具一切香非一切香具一切觸非一切觸具一切法非一切法具一切智非一切智其果名具慈甘泉得此泉

味自然飽滿無饑無渴姿容端正妙麗希有到靈解山不生不滅湛然常住證無生果爾時四座見此神變散本微華顯未來事歡喜無量不可思議衆中疑惑未了斯事不審天尊所會之處地皆瑠璃光明普照地獄咸

寧其華飄飄遍滿法界非青非白非赤非黑非長非短非大非小非廣非狹入於細微離諸色像又云華中有自然之果其果圓淨具一切法非一切法得此泉味自然飽滿到靈解山不生不滅唯願慈尊告所未悟

天尊曰善哉善哉子之所問要如是乎要如是乎諦聽善思吾今為汝顯本微華此華玄妙終劫說之亦不能盡略其機要示以一流我分身法界遍滿虛空無大不覆無小不入悟此華者舉目便正衆生迷惑信心淺薄耽著愚愛不敬三寶富貴自在輪迴生死冥冥長夜無曉無出苦惱相習諸惡業報生貧病或饑或渴或寒或熱如是苦惱非可能說種種因緣隨其業報爾時衆中有一童子名曰善達從座而起上白

天尊不審本微之華華中有自然之果散滿法界盡諸微塵無大不覆無小不入為青為白為赤為黑為長為短為大為小為廣為狹為見為聞為來為去為天為地如是華果浩博周普遍成法界不可思議不審一切衆生

同稟一華云何諸緣各有差別善惡不同生死業對苦樂殊形返覆往還受生各異或生邊夷或生中國或生奴婢或生人王或生貧賤或生富貴或生跛躄或生具足或生愚癡或生智慧或生慳貪或生布施或生好殺或生慈悲或生五逆或生孝順或生受苦或生受樂或生瞽盲或生聰哲或生禽蟲或生魚鼈如是業報種種不同唯願慈尊分別解釋

天尊曰善哉善哉子之所問甚得機緣吾今為汝顯諸因緣一切諸法相好不同苦樂殊別皆有因緣由其業行信心不等造惡行好受報無差如影隨形如響應聲一切諸法生皆從一一本微華種種相好衆生迷惑不自覺知於實相中橫生顛倒顛倒法成受苦見微自生不孝慈愛遠離失本求末冥冥不曉長處闇中無有解脫我懷慈愍種種濟度願法因由衆中疑惑不了業緣諸法空寂畢竟無我推問東方生物有邊崖不南方顯照有極源不西方衰殺有情變不北方冥昧有窮道不色聲香味觸有香聲觸不貪嗔癡縛有

貪嗔癡縛不善惡行業有行業可修不也大慈所顯推問諸法行業並無所得云何差別苦樂不同

天尊曰諸法幻生幻滅諸法幻滅幻滅幻生如是幻相生滅幻無生滅幻相去來幻無去來幻相貪癡幻無貪癡幻相取捨幻無取捨幻相煩惱幻無煩惱幻相思愛幻無思愛幻相差別幻無差別一切衆生業緣端正生滅無幻去來無幻貪癡無幻取捨無幻煩惱無幻思愛無幻差別無幻如是空寂究竟道場善達聞之忽然覺悟端坐內思伏地嘿然不起于坐四衆嚴整各各欲容須臾之間天尊發現本微之華從地踊出遍滿法界無大不覆無小不入一一華中各有寶座座方一丈諸天雲集無有迫迤一一座中各有天尊一一尊所各說諸法秘密真藏一切諸法無不自在非空非有非長非短非去非來非高非下具一切法非一切法是名真法具一切色非一切色是名真色具一切聲非一切聲是名真聲具一切香非一切香是名真香

具一切味非一切味是名真味具一切觸非一切觸是名真觸具一切智非一切智是名真智如是諸法本微玄妙能生法界法界之中能生衆聖衆聖能為法母通達無礙不生不滅無內無外無長無短無去無來是名道

母道母能生惠因惠因能生惠果以惠果故諸法淨諸法淨故無因無果云何有衆生差別云何有衆生取捨云何有衆生貪欲云何有衆生業報云何有衆生持戒云何有衆生破戒云何有衆生得道云何有衆生失道如是秘密真藏大乘經典世所希有衆生殃乃自生顛倒聞此秘密真藏大乘反生誹謗自招罪業迷沒聞中如盲者不親光明聾者不聞鐘鼓善達汝今悟解由未盡源雖悟諸相心都未了於實相中浩博官然反成迷惑善達聞之朗然覺悟歡喜踊躍歎未曾有四衆法然各各思惟稽首伏地須臾之間有一童子名曰達相從座而起稽首天尊一切衆生皆從一既得從一何好何惡若從一者心亦從一心既從一種種施為造好作惡皆心

所作既是心作皆一所為若一所為何有苦樂既有苦樂即是因緣業行所為苦樂報對一若有對不名為一既名一已即無有對云何有善惡苦樂殊別

天尊曰如是如是一切衆生皆從一一生無相生既無相心亦無相心既無相種種施為造好作惡皆是空寂何好何惡衆生惡聞千思萬慮不止一源源既不止諸行競受善惡殊形自招業對於一相中受諸苦惱衆生懷惡貪有所纏不能了達既不了達積惡日深冥冥長夜何能識本既本識本離大慈源源既遠離迷失父母既失父母兄弟怨憎更相憐閔種種懷惡心恒察察不顧死生惡業既成無明障重遂至煩惱煩惱所牽飄浪生死強生惡愛惡愛著身如魚失水豈能得久恩愛既集罪業日臻不久之間業緣各至隨分報對受諸惡業輪迴三界墮落諸苦遂成差別復告惠力童子曰衆生受業可推求不衆生心數可推求不衆生煩惱可推求不衆生業報可推求不衆生顛倒可推求不衆生

無畏力不集會者不信大乘宿緣淺薄雖被
 慈光不能悟解譬如採寶無有導師了無識
 者法性深奧覺無所覺無所覺而覺是名真
 覺得無所得無所得而得是名真得如是秘
 密小乘衆生不能聞不能見不能修不能行
 不能信今為開解令無量衆悟解道真爾時
 大衆聞是語已踊躍歡喜得神通力承道威
 光以偈頌曰
 慈尊願真藏 住在靈解山 諸仙並雲集
 示現本微華 飄飄滿世界 玄妙難思議
 一一華中果 自然清淨圓 非青非色像
 非長非短因 具一切智法 微妙莫能尋
 衆生到迷惑 耽著恩愛親 富貴懷自在
 死入長夜門 相牽習諸惡 業報生貧窮
 常懷饑渴想 苦惱莫能通 信心不淳厚
 跛躄生盲聾 雜道甚遙遠 不見日月光
 天尊願真藏 非幻亦非真 諸法得自在
 善惡無不均 塵中方丈室 容衆巨沙塵
 去來無迫迤 說法度天人 衆中歡喜悅
 各悟大乘因 了了見法性 無非功德林

勇猛發弘願 普度於衆生 證成無上道
 究竟為法城
 我等徒衆無量劫 學小迷闇不能行
 離身尋求求竟道 辛苦逐疑失山間
 忍苦饑寒無報應 不覺方寸寸能生
 諸法從心心證道 悟解倏忽忽神靈
 爾時大衆說此頌已重識身心顯天尊力功
 德無量不可思議終劫說之亦不能盡唯願
 天尊開示未聞顯因緣相一切衆生令得悟
 解了達大乘爾時
 天尊聞諸徒衆說此偈頌歎未曾有善哉善
 哉快能顯了深問其義本末未祛汝今四座
 以無聽無不聽而聽受之我今以無說無不
 說而說授之爾時大衆聞是語已悟解法性
 了真藏深證無生果天尊於是重宣是義而
 說頌曰
 真藏微妙無形假 無狀無名不腐壞
 隨流混合常自然 寂靜惠光照無礙
 圓法究竟為軌式 常湛清淨善能貸
 無量賢聖由此悟 萬劫澹然不移度

軌法消伏功德林 滅除三毒貪嗔路
 和柔大力道眼開 五情豁爾無留固
 我今慈愍救一切 普施甘露真妙藥
 自然流入性海中 勇降降伏諸魔賊
 我以無量功方便 曉示本微甚奇特
 萬相玄法實性中 出入去來常軌則
 衆生迷惑不信真 愚癡世間無歇足
 我今自歸真性海 諸法寂泊亦復然
 六情受納常無滌 虛空法界是道身
 衆生妄惑來日久 念念迷樂習業因
 冥冥闇獄處無窮 苦痛難聞難可臨
 汝等徒衆各努力 絕想因緣各內尋
 方寸自在金剛力 成真證果不勞心
 天尊說此頌已諸仙童子驚怖喪忙自便改
 革各悟大乘歡喜無量不審天尊所說經法
 即顯一切衆生身為法聚若一切衆生身為
 法聚者唯願天尊慈哀為說令無量大衆及
 下方一切諸衆生遠解自身究竟法聚息於
 外求見其知識
 天尊重告諸仙童子一切衆生身無邊相名

101 A D 207

為經法亦名法聚何以故解惑立名不同體
解究竟名為秘密真藏迷惑立名同體相解
名為衆生亦名生死亦名苦聚亦名顛倒亦
名外求何以故衆生不解名之為惑以是緣
由不識自身自身之中有無量法聚具三清
境衆生迷惑遂使外求不信正法不求善友
名為衆生將法逐法迷沒世間從劫至劫終
無曉了若遇善知識者名為宿緣種其福德
何以故昔因今果得遇天尊為其說法顯無
上真藏秘密重玄了達昔因證今生果善男
子汝等若欲求者先當自求若自求者秘密
法現廣開真藏顯三寶源以此法藏統收諸
法盡無邊底惠力童子白
天尊言大師所說教諸衆生若求法者先當
自求若自求者秘密法現廣開真藏顯三寶
源雖聞聖說不能解了不知何者為道何者
為法何者為師何者為衆何者為內何者為
外以不知故願為說之
天尊告惠力童子諸善知識汝所問者問於
自求真藏法現汝今澄神靜處吾今廣為說

之一切衆生身性清淨天真正道隱在其中
名為真藏此真藏昔無內無外無法聚無衆
生聚無道德聚究竟寂滅名為秘密隱為沖
寂顯為應妙廣示多途能開物障利益深遠
諸仙童子及諸眷屬天仙子無量善衆歡
喜歎曰善哉善哉天尊功德普照無窮潤益
蒼生平等無礙
天尊告諸四衆及大弟子當來衆生若有讀
誦受持講說真藏經者此人功德不可思議
則見我身成無上道何以故此經說諸法根
本利益處深切德廣遠難可譬喻若有衆生
信心讀誦捨諸他念即得道眼照三世因緣
平等無礙悟因非因悟果非果達身心相非
心不心亦不心是真心相相無所相無相
之心遍周法界法界之相不生不滅前際不
去後際不來今不往古古不來今今古一相
一無所相隨分解脫湛寂無為功德具足爾
時四座同聲唱言歎法微妙真藏大乘功德
希有奉辭專頌泣涕還國
无上內秘真藏經卷之二

无上內秘真藏經卷之三

洪十

解脫品

是時元始天尊遊居濟生國土檀林園中與
諸眷屬四方雲集無量等衆各各莊嚴到檀
林園聽天尊說爾時天尊在虛空中端然不
動莊嚴妙麗坐師子座宣揚正法時善明童
子在大衆中忽然而起稽首道前上白天尊
大慈希有善慶羣生念諸徒衆今發善心修
无上道不害行何行觀何法調理身心
天尊曰善哉善哉如汝所問濟生國土宣揚
正法度諸衆生汝今諦聽吾為汝說善男女
等各發善心修无上道調伏其行滅諸魔賊
守一潛生平等無二作如是行作如是觀一
切羣生有識無識有形無形皆悉正慧成无
上道如是成道無量法界諸天品類羣生實
無羣生得成道者何以故若有羣生可行可
觀有身相者有滅度者有成道者有失道者
即壞世法所謂入諸法界而行智慧入諸煩
惱而行智慧入諸生死而行智慧入諸貪愛
而行智慧入諸國土而行智慧入諸山林而